



Nunatsinni Nakorsaaneqarfik

Peqqinnissakkut sullissinermik suliakkiussineq pillugu ilitsersuut nr. 4/2022

Nakorsanut, meeraaqqerisunut, peqqissaasunut, juumuunut il.il.

Saqqummiunneqarfia 06. 09 2022

Peqqinnissakut sullissinermik suliakkiussineq

Ilitsersuummi matumani peqqinnissakkut sullissinermi suliaassanik isumaginninnermi akisussaaffimmik allamut tunniussinermi, suut tunngaviunerat nassuiarneqarpoq. Ilitsersuut Peqqussummut nr. 860 18. december 1991-imeersumut Kalaallit Nunaannut tunngasumut, nakorsaarneq pillugu inatsisip atuutilersinneqarneranut (nakorsatut sulineq pillugu inatsimmut) attuumassuteqarpoq. Tamatuma saniatigut danskit inatsisaat aallaaviuvoq.

Peqqinnissaqarfiup iluani avataanilu suliaassat ersarissunik toqqammaveqarluni ersarissumillu akisussaaffiliilluni isumagineqarnissaat, napparsimasunut isumannaallisaanermut pingaaruteqarpoq. Ilitsersuummi nakorsap suliaasaqarfimmi iluani suliaassanik suliakkiernerminut atatillugu peqqissaarnissamik ilumoorussinissamillu (nakorsaarneq pillugu inatsimmi kapitali 2, § 6, imm. 1) piumasaqaatinik qanoq eqquutitsinissaanik erseqqissaanissaq siunertaavoq. Ilitsersuummi inunnut allat suliaasaqarfiisa iluanni suliakkerneqartunut piumasaqaatigineqartut nassuiarneqarputtaaq.

Ilitsersuut eqaatsumik pissusissamisoortumillu Peqqinnissaqarfimmi Peqqinnissaqarfiullu avataani sullissivinni suliffeqarfinnilu suliaassanik tunniussisinnaanermut ikorfartuutaassaaq. Utoqqaat illuini kommuninuit namminersortunillu ingerlatani allanilu peqqinnissakkut sullissineq, Peqqinnissaqarfimmisuulli suliakkiineq pillugu ilitsersuummi matumani toqqammavissanit tunngaveqarpoq.

Suliakkiineq ilitsersuummi toqqammavissat aallaavigalugit ingerlanneqarpat, peqqinnissakkut sullissisut akornanni suliakkiernermit atatillugu kiisalu peqqinnissaqarfiup immikkoortui (napparsimmaviit, peqqissaaviit, nunaqarfinni nakorsartitsiviit il.il.) pisortaqarfiillu (suliffeqarfiit namminersortut, utoqqaat illui kommuninilu sullissiviit allat) akimorlugit napparsimasunut isumannaallisaanermut annertusaqaataassaaq. Ikiortinik atuneq pillugu erseqqissaanissaq, allallu suliaasaqarfiinik suliakkiernerup qanoq ingerlanneqarsinnaanera pillugu ilaatigut innersuussuteqarluni, – tamatumunnga atatillugu

suliakkiernerup illersorneqarsinnaasumik pisortaqarfiit sumiiffiillu akimorlugit ingerlanneqarsinnaanera, ilitsersuummi siunertaavoq.

Ilitsersuummut atatillugu taaguutip "ikiortip" peqqinnissakkut suliaassanik suliakkiisup suliakkiussamillu suliaqartut akornanni pissutsinut nassuiaanermi atornerqamera erseqqissarneqassaaq. Atorfininnermut inatsisitigut appasinnerusumik inissisimasariaqanngilaq ersarissumilli akisussaaffiliisalluni. Suliakkiussummik isumaginninnerup, allakkiami matumani toqqammavissat naapertorlugit, immikkoortuni tamani peqqinnissakkut sullissiviusuni akisussaaffiup ataani inissisimasumi ingerlanneqarnissaata qulakkeernissaa, qullersat akisussaaffigaat.

Siunertaq

Ilitsersuummi matumani siunertaavoq:

- Suliakkiernerup suunerata paatsuugassaajunnaarsinnissaa.
- Suliakkiernermi toqqammavissanik nassuiaanissaq
- Peqqinnissakkut sullissinermi suliakkiernermi akisussaaffiup sumiinneranik ersarissaanissaq.

Peqqinnissakkut sullissisinnaatitaasut

Peqqinnissakkut sullissisinnaatitaasut aalajangersimasumik sullissisutut imminnut taasinnaapput. Sulisinnaatitaanermi piginnaanillit peqqinnissakkut sullissisuunissaat qullakkeerniarneqarpoq. Sulisinnaatitaaneq pillugu inatsimmi peqqinnissakkut sullissisunut atuuttumi, nakorsatut peqqinnissakkullu sulisinnaatitaasut allat peqqissaarlutik ilumoorussillutillu sullissinissamut pisussaaffeqarnerat allassimavoq.

Peqqinnissakkut sullissisinnaatitaasut ilaannut suliaasaqarfiup pineqartup ilaata peqqinnissakkut sullinnermut naatsorsuussaana, inatsimmi aalajangersagaavoq. Taamaammat peqqinnissakkut sullissineq immikkut suussusaa nassuiaq, sulisinnaatitaanermut uppersaateqanngitsunit suliarineqarsinnaanngilaq. Peqqussut (nakorsaarneq pillugu inatsimmi kapitali 1, §§1 aamma 2) naapertorlugit nakorsatut ilinniarnernik angusereernermini sulisinnaatitaanermut uppersaammik pissarsinnaavoq nakorsatullu sulisinnaatitaalluni. Allakkiami matumani pineqarput nakorsat taama imminnut taasinnaasut aalajangersimasumillu taama taaguutilinnuinaq atuuttumut peqqinnissakkut sullissisinnaasut. Juumuulli kigutilersullu killilinnik-

isumaginissaannut nakorsap suliakkiussarisariaqanngisaanik-suliassaqrfeqarnerat oqaatigineqassaaq.

Peqqinnissakkut sullissinermik suliakkiussineq

Peqqinnissakkut sullissisup sulisinnaatitaanermut uppersaatillip (nakorsap) nammineq suliassaqrffimmini suliassamik nakorsatut sulisinnaatitaanermut uppersaateqanngitsumut (ikiortimut) suliakkiinera, peqqinnissakkut sullisinermi suliakkiineruvoq. Tamatumani ikiorti peqqinnissakkut sullissisunit allaneersuusinnaavoq ilinniagaqanngitsuusinnaallunilu.

Nakorsap suliakkiisup nammineq sumiiffimmiinnissaa piumasaqaataangilaq, nakorsalli akisussaasup, akisussaaffik ersarissumik inissillugu suliassap isumannaatsumik illersorneqarsinnaasumillu suliarineqarnissaanik qulakkeerinissaa piumasaqaataavoq. Suliakkiineq sapinngisamik allakkatigut uppersagaassaaq:

- suliakkiineq sivisujaamik ingerlanneqassappat.
- suliakkiinermi assigiinngitsunik suliqaartussat arlallit pineqarpata.
- suliakkiussaqaq paasilertorumaappat, suliakkiikkallu suliakkiussap imarisaanik annertussusaanillu ataatsimut isiginnissinnaanera ajornartorsiutaasinnassappat.

Suliakkiinermi toqqammavissat malinneqarpata, peqqinnissaqarfup immikkoortuisa arlaanniit arlaannut, pisortaqrffit akimorlugit sumiiffimiillu sumiiffimmut suliakkiisoqarsinnaavoq. Suliakkiikkap (ikiortip) piginnaasaasa suliap suuneranut nalimmassarneqarsimanissaat – suliamalla tunngatillugu akisussaasumik nakorsaqarneragut imal. qarasaasiakkut nakorsartitsissut atorlugit nakorsap akisussaasup suliakkiikkallu akornanni toqqaannartumik attaveqarnikkut ilitersuunneqarsinnaaneq ikiorneqarsinnaanerlu suliakkiinermi piumasaqaataapput.

Suliakkiinerunngilarli:

- Peqqinnissakkut sullissisup sulisinnaatitaanermut uppersaatillip, peqqinnissakkut sullissisumik allamik sulisinnaatitaanermut uppersaatillimmik ilitersuinaera.
- Peqqinnissakkut sullissisup sulisinnaatitaanermut uppersaatillip napparsimasumik qanigisaasumillunniit imminut nakorsarnissamik ilitersuinaera.
- Ikiortip nakorsaanermi suliakkiussaareersumut ikiunnera. ass. iisartakkat puuannik ammaassineq.

Ilitersuummi matumani tullullugit nassuiarneqartussat tassaapput suliakkeeriaatsit pingaernerit; suliakkiineq, aalajangersimasumik suliakkiineq, suliakkiissummik suliakkiineq suliassanillu agguataarineq.

Suliakkiineq

Nakorsap akisussaasup pisumi aalajangersimasumi napparsimasumut aalajangersimasumut tunngatillugu,

suliassaqrffimmi iluani suliassat arlaannik arlalinnillunniit ikiortimut suliakkiissaaq. Tamanna napparsimmavinni nakorsap ikiortimut (peqqissaanermi ikiorti/assistenti imal. peqqissaasoq) napparsimasoq aalajangersimasoq nakorsaammik tuneqqullugu, misissugassamik aaveqqullugu, tarajulersuiffissamik taqaagut ikkussivigeqqullugu suliakkiussinerani pigajuppoq.

Aalajangersimasumik suliakkiineq

Nakorsap akisussaasup toqqamavissat aalajangersariikkap iluani, nakorsartinnissamut pisariaqartitsinermik tamatumingalu suliqaarnissamik nammineq naliliinissaanut ikiorti suliakkiissavaa. Nakorsaanerup allakkatigut maleruagassat aalajangersimasut naapertorlugit ingerlanneqarnissaata ersarissumik nalunaarsimanissaa, nakorsap akisussaaffigaa. Tamatumani peqatigisaanik suliakkiikkat suliamik ingerlatsinissamut piginnaaneqarsorinissaat suliamalla akisussaaffimik tigusinissamut piginnaaneqarnissaat, nakorsap akisussaasup qulakkiissavaa.

Taama suliakkiisarnerup sullissivinnik suliffeqarfinnillu kiisalu illoqarfinnik nunaqarfinnillu aalajangersimasumik nakorsaqanngitsunik, peqqinnissakkulli sullissinerup nakorsap allamiittup suliakkiinermi tunngaveqartunik eqqumaffigininnissaaq immikkut pingaaruteqarpoq. Suliassaqrffimmi suliakkiinermi toqqammavissap paatsoorneqarsinnaajunaarlugu nassuiarneqarnissaa, nakorsap kia suliakkiussamut akisussaasuunera sapinngisaq tamaat ersersillugu, allaganngorlugit uppersarnissaa pingaaruteqarpoq. Nakorsat aalajangersimasumik suliakkiinermi akisussaasut ikiortillu suliakkiikkat taarsaanneranni, sulisuttaaq nutaat akisussaaffiit agguataarneqarnerannik suliakkiinermilu toqqammaviusunik ilisimaarinninnissaat pingaaruteqarpoq. Aalajangersimasumik suliakkiineq pingasunut immikkoortinneqartarpoq:

1. Napparsimasunik ataasiakkaanik nakorsaanermi aalajangersimasumik suliakkiineq
2. Napparsimasunik aalajangersimasunik nakorsaanermi aalajangersimasumik suliakkiineq
3. Peqqinnissakkut sullissisunut aalajangersimasunut aalajangersimasumik suliakkiineq

1. Napparsimasut ataasiakkaat sullinnissaannut aalajangersimasumik suliakkiineq

Napparsimasumik aalajangersimasumik nakorsaanermut tunngatillugu aalajangersimasumik suliakkiisoqarsinnaavoq. Nakorsap suliakkiinnginnermini, pisumi aalajangersimasumi napparsimasumut tassungarpiaq taamaallaat atuuttussamik suliakkiinissamik isummereersimanerani, taama pisoqarsinnaavoq. Taamaalilluni nakorsap napparsimasup nakorsarnissaa isummerfigereersimassavaa, kingornali nakorsaaneq allamut suliakkiullugu.

Nakorsap napparsimasut ataasiakkaat immikkut tamaasa isummerfigissavai nakorsaasiinerullu/nakorsaanerullu allattugaatinut nalunaarneqarnissaa qulakkeerlugu.

2. Napparsimasunik nappaataat suussusersisanik aalajangersimasumik nakorsaanissamut suliakkiineq

Aalajangersimasumik suliakkiineq, nakorsaq tamanna sioqqullugu napparsimasunut ataasiakkaanut tunngatillugu nakorsaaneq aallartinneqassanersoq qaquguluunniit aallatinneqassanersoq isummersimannikkaluarpalluunniit, napparsimasunik nassuiarlukkanik nakorsaanermit sammitinneqarsinnaavoq. Assersuutitut napparsimasunik nassuiarlukkanik nakorsaanermit aalajangersimasumik suliakkiineq, akiussutissiinermit imal. ajoqusernernik nalinginnaasunik nakorsaanermit atatillugu naapertuussinnaavoq.

3. Peqqinnissakkut sullissisunut nassuiakkanut aalajangersimasumik suliakkiineq

Nakorsaq suliap napparsimasunut aalajangersimasunut aallartinneqarnissaanik isummeqqaarani- ilaatigut peqqinnissakkut sullissisunanut ilinniagalinnut aalajangersimasunut peqqinnissakkut sullissinermit allartitsinissamik suliakkiinnaasarpoq. Suna toqqammavigalugu peqqinnissakkut sullissinerup peqqinnissakkut sullissisunit allanit namminersuutigalugu ingerlanneqarsinnaanera, allaganngorlugit maleruagassani nassuiarlukkani allassimassaaq. Peqqinnissakkut sullissisunut aalajangersimasunut aalajangersimasumik suliakkiinermit assersuutissaapput timimik sungiusaasut seeqquusalersittunik nalinginnaasunik naliliinissamut piginnaangorsaaqqillutillu sungiusaanissamut aalajangersimasumik suliakkikkat.

Toqqammavissatut aalajangiunneqareersup iluani nakorsaanermit isumaginnineq, peqqinnissakkut sullissisunut allanut suliamik ingerlatsinissamut piginnaanilinnut suliakkiunneqaraluaq, aalajangersimasumik suliakkiinermit nakorsaanermit akisussaaffik nakorsami akisussaasumiippoq.

Suliakiissummik allanut suliakkiineq

Suliakiissummik allanut suliakkiisoqartarpoq ikiorti suliakiissummik allanut tunniussigaangat /suliakkiigaangat. Suliakiissummik suliakkiinermit suliakkikkap suliamik ingerlatsinissamut piginnaaneqarnera ikiortip qulakkiissavaa. Suliap ingerlannissaanut illitersuummik naapertuuttumik ingerlatitseqqinnissaaq ikiortip akisussaaffigaa.

Suliakkiussamik suliakkiinerup illersorneqarsinnaanerani naliliinermit, ilaatigut aaqquisuussaaniikkut pissutsit eqqarsaatigineqassapput. Nakorsap peqqinnissakkut sullissinermit suliakkiinermit suliakkiussamik suliakkiisoqannginnissaa aalajangersinnaavaa ikiortimullu oqaatigalugu. Nakorsap suliakkiussamik allanut suliakkiussinnginnissaaq ikiortimut oqaatiginngippagu, suliakkiussamik suliakkiussinissap ilinniagaqassutsikkut

illersorneqarsinnaanerani taamaaliortoqarsinnaanerani illu nakorsap naliliisimaneratut paasineqassaaq.

Suliakkiussat nalinginnaasumik allanut suliakkiunneqarsinnaanngitsut sapinngisamik paatsuugassaajunnaarlugit maleruagassani allassimassapput. Malaruagassat suliarineqarnissaat – suliakkiussamik allanut suliakkiinermit akisussaaffiup kimut tunnissaata ilisimaarineqarnissaa, Napparsimmavissuarmi sinerissamilu qitiusumik immikkoortuni pisortat akisussaaffigaa.

Suliakkiummik allanut suliakkiineq nakorsaatiniq agguaanermit, nalinginnaasumik nakorsaatilerinermit ikiortip piginnaaneqarnerani qullersat akisussaaffigisaannut atatillugu atuuppoq.

Suliassanik agguataarineq

Suliassanik agguataarineq tassaavoq nakorsamit suliakkiussaannngitsooq. Suliassanik peqqinnissakkut sullissinermit tunngatinneqanngitsunik taamaammallu nakorsap suliakkiussassarinnngisaanik suliassanik agguataarisoqarsinnaavoq. Taakku tassaasinnaapput suliassat nalinginnaasut imal. paaqutarinninnermit tunngiuinerimullu tunngasut peqqissaanermit suliallit, nerisaqarnermit siunnersortit, sungiusaasut il.il. nalinginnaasumik suliassaannut ilaasut.

Suliakkiinermit akisussaaffik

Nakorsaanermit napparsimasunut isumannaallissaaneq isumaginarlugu, suliami akuusut suliakkiinermit akisussaaffeqarput. Taamaammat tulluuttumi qullersanut, nakorsamut suliakiisumut ikiortimullu suliakkinneqartumut akisussaaffimmuut tunngasut nassuiarneqassapput.

Qullersat akisussaaffiat

Sulianik aaqquisuussinermit napparsimasunut isumannaallisaanermit isumaginnittunut Peqqinnissaqarfimmi qullersat pingaarnertut akisussaasuupput. Suliffeqarfimmi sullissivinnilu allani taamatuttaaq qullersat pingaarnertut akisussaasuupput. Taamaallitullit qullersat peqqinnissakkut sullissinermit suliassat, ilinniagaqassutsikkut pisarialinnik piginnaasalinneq suliarineqarnissaat, taakkulu- suliakkiussat Peqqinnissaqarfimmiippata avataaniippataluunniit- nakorsap pineqartumut akisussaasup suliakkiinerani tunngaveqarnerat qulakkiissavaat.

Nakorsat ikiortinut suliakiissutaasa illitersuummi matumani nassuiarneqartutut ingerlanneqarnissaannut nakorsallu tamarmik suliakkiinermit atatillugu maleruagassanik akisussaaffimillu ilisimanninnissaat qullersat akisussaaffigaa. Tamatumani suliakkiinerup ikiortillu piginnaasaanik naliliinerup ersarissuunissaat –suliakkiussaq Peqqinnissaqarfiup avataaniikkaluarpalluunniit aaqquisuussaaniikkut sumi inissisimanermit tunngasut, attaveqatigiinnermit aqutissat periusissallu ilaapput.

Aalajangersimasumik suliakkiernerut atatillugu ilinniagaqassutsikkut akisussaaffiup sumiinneranik, suliaasat sorpiaanerat suliakkiernermilu toqqammavissat ersarissumik nassuiarlugit allassimasunik maleruagassaqaarnissaanik qulakkeerinissaq, qullersat akisussaaffigaat. Sulisut suliarisassaminnut piginnaaneqarnissaat suliaasanullu naapertuuttunut ilitersorneqarnissaannik ilinniartinneqarnissaannillu qulakkeerinissaq, qullersat akisussaaffigaataaq. Taamatuttaaq suliani ingerlatsinerup naapertuuttumik nakkutigineqarnissaanik qulakkeerinissaq qullersat akisussaaffigaat.

Nakorsap akisussaaffia

Nakorsaq namminerminut suliarisinnaatitaasunik peqqinnissakkut sullissisunut sulisinnaatitaanermit uppersaatiinnut allanullu suliakkiisnaavoq, ikiortilli eqqortunik piginnaasaqarnera suliaaminullu toqqissisimanera qulakkeeqqaassavaa. Nakorsap ikiortip allap suliarisinnaasaanik suliakkerneqarnermi paatsuugassaangitsumik ilitersorneqarsimanissaa, ikiortillu ilitersuutinik paasinnissimanera qulakkiissavaa. Ikiorti suliaasap suliarinissaanut ilisimatinneqassaaq kingunerluutaasinnaasunillu nakorsaasinnaanissamut ilitersorneqassalluni, tamatumunngalu atatillugu qaqugu naapertuuttumik ikiortissarsiornissamik ilisimatinneqassalluni. Ilitersuummissaq suliakkiinermi toqqammavissap nassuiarluarneqarneragut killilerneragullu qanoq annertutiginera takuneqarsinnaassaaq.

Nakorsaq pisariaqartitsineq naapertorlugu suliakkiikkaminik nakkutillissaaq. Aalajangersimasumik naliliineq, suliakkiussap suunera kiisalu ikiortip suliaasamut tunngatillugu piginnaasai ilinniakkatigullu piginnaasai apeqqutaallutik nakkutillineq annertussuseqassaaq.

Napparsimasunut isumannaallisaanermit atatillugu navianaateqarsinnaasut annertusiartortillugit, sulianik ingerlatsinermit nakkutillineq annertusiartussaaq. Ikiortip suliaasap sungjusimangippagu tamatumunngalu atatillugu ikiortip ilinniakkani aqqutigalugu suliaasap piginnaaneqarfiginngippagu ilinniartinneqarsimangippallu imal. toqqissisimanartingippagu, suliamik ingerlatsinermit annertunerusumik nakkutillisoqassaaq.

Nakorsaq ikiortimut suliakkiippat, allaganngorlugit maleruagassanik ersarissunik paasilerutoruminartunillu suliap allamut imal. peqqinnissakkut sullissisunut suliakkiunneqarnera napparsimasooq pillugu allattugaatinut nalunaarlugu uppersarneqassaaq.

Ikiortip akisussaaffia

Allamit suliarisinnaatitanik suliakkinneqartup ilitersuunneqarnini maleruagassallu atuuttut naapertorlugit suliamik ingerlatsinissi akisussaaffigaa. Ikiorti suliakkiikkap ilitersuut aamma/imal. maleruagassat atuuttut naapertorlugit sulippat, nakorsaq akisussaasoq imal. peqqinnissakkut sullissisutut sulisinnaatitaasoq suliakkiisooq-

suliakkiut tigussaappat, aalajangersimasuuppat imal. ingerlateqqitaappat- suliamik ingerlatsinermit akisussaasuussaaq.

Ikiortip ilitersuut aamma/imal. maleruagassat atuuttut malingippagit, taassuma nammineq suliamik ingerlatsinissi akisussaaffigissavaa. Tunngaviusumik taamaapportaaq peqqinnissakkut sullissinermit atatillugu suliakkiussanik uppersaananermit. Peqqinnissakkut sullissisut ilinniagallit tamarmik kukkussuteqarunik imal. maalaarutigineqarunik nammineq suliaminnut tamakkiisumik akisussaatinneqarsinnaassapput. Suliakkiussanut illersorneqarsinnaasumik suliarisinnaanissaat piginnaasaqarfiginngitsorisaminut toqqissisimanartingisaminulluunniit naaggaarsinnaaneq ikiortip akisussaaffigaa.

Ilinniartut

Ilinniartut qaffasinnerusumillu ilinniagallit sulinermit sungiusarnermi angusassatut siunniussat pillugit nalunaarutit atuuttut naapertorlugit sulissapput. Ilinniartunut qaffasinnerusumillu ilinniagalinnut suliakkiinermit aalajangersimasumik sulisunut suliakkiinermit maleruagassat atuupput. Suliakkiineq tamatigut immikkut naliliinermit tunngaveqassaaq.

Suliakkiunneqarsinnaanngitsut

Ikiortip suliarisinnaatitat iluanni suliaasamik isumaginnissamut tamakkiisumik piginnaaneqarnera qulakkeerneqarpat nakorsallu akisussaaffik tiguppagu, tunngaviusumik peqqinnissakkut sullissinerit suulluunniit allamut suliakkiunneqarsinnaapput.

Makkuli ilaanngillat:

- Uppersaatiit pisortanut atugassiat toqusunullu uppersaasioq.
- Toqusunik misissuineq (qanga toqusimanerup, toqqutaasup qanorlu toqunerup aalajangiifiginissaanni,) sapinngisamik nakorsamit isumagineqassapput, nakorsaqartinnaguli inunnut nakorsamit pisinnaatitaffiikkanut suliakkiunneqarsinnaapput (toqusunik misissuisarneq pillugu inatsisip Kalaallit Nunaannut atuutilersinneqarnera pillugu peqqussut nr. 533, 6. september 1988-imeersoq, § 2, imm. 2 aamma imm. 3).
- Qanga toqunerup qaratsap suliunnaarnera tunngavigalugu aalajangiiviginissaa suliakkiunneqarsinnaanngilaq nakorsallu marluk tamatumani peqataassallutik.
- Nakorsat tarnimikkut nappaatiinnut pinngitsaaliisummik iliuuseqarnissamut aalajangiussaata allanut suliakkiunneqarsinnaanngilaq.

Maalaarutinut nakkutilliinermullu tunngasut

Nakorsaq ikiorteqarnermini peqqissaanngikkuni
ilumoorussinngikkunilu, maalaartoqarpat Napparsimasut
Maalaarutaannut Aqutsisoqarfimmit
isornartorsiorneqarsinnaavoq. Ikiorteqarnermi sumiginnaanerit
ingasannerusut arlaleriakkalluunniit imal. mianersuaalliorneq
pillarneqaataasinnaapput. Taamatuttaaq suliakkerneqartoq
suliakkiussamik suliaqarnermini peqqissaaranilu
ilumoorussinngitsoq akisussaatinneqarsinnaavoq
pillarneqarsinnaallunilu.

Suliakkerneqanngitsoq taamaalillunilu ikiortaanngitsutut
naliliivigineqartoq, aperisaqarani allanit suliarisinnaatitani
nammineq suliaqarsimasoq pillaatissinneqarsinnaavoq
(nakorsaqarneq pillugu inatsimmi kapitali 6, §§23 aamma 24).

Nunatsinni Nakorsaaneqarfik 6. september 2022
Henrik L. Hansen/Louise L. Faber

Landslægeembedet, Box 120, 3900 Nuuk
Telefon: 34 51 92, E-mail: nun@nanoq.gl